

L'avignî digjitâl dal furlan al passe pe Europe

La ARLeF e partecipe al progjet Interreg Italie-Svizzere "DIGI R-L-F".

La iniziative e met adun Friûl, Sudtîröl e Grisons par disvilupâ tecnologiis digjitâls a supuart di furlan, ladin e rumanc.

Tra i pôcs progjets selezionâts e finanziâts tal 2026 inte suaze de cooperazion transfrontaliere europeane Italie-Svizzere e je ancje "DIGI R-L-F", une iniziative che tra i siei partners e à la ARLeF – Agenzie regional pe lenghe furlane. Il progjet al ponte a promovî il futûr digjitâl des trê lenghis minoritariis retoromanichis: il furlan in Friûl, il ladin in Sudtîröl e il rumanc tai Grisons. A cjâf de iniziative e je la Provincie Autonome di Bolzan. Dongje de ARLeF a partecipin la Lia Rumantscha – la associazion che e met adun lis organizacions linguisticis rumancis in Svizzere – Eurac Research e la Libere Universitât di Bolzan.

Dal 2026 al 2028 i partners a lavoraran insiemi par elaborâ une strategjie condividue tal setôr digjitâl. L'obietîf al è creâ une rêt di competencis in stât di infuartî la tecnologie linguistiche e ufrî ae popolazion servizis digjitâi inovatîfs e facii di acedî. Il progjet al ponte a fâ sù un ecosisteme digjitâl condividût, in maniere di fâ fevelâ fra di lôr istituzions e centris di ricercje.

La sfide e je dople: di une bande garantî la vitalitât des lenghis retoromanichis intun mont simpri plui globâl e digjitâl; di chê altre infuartî in maniere sostignibile la identitât culturâl des comunitâts, soredut tes gjenerazions plui zovinis, favorint une presince digjitâl plui ative. La iniziative e rapresente ancje une dimostrazion concrete dal valôr des colaborazions europeanis pes minorancis linguisticis.

Pe ARLeF, la partecipazion a DIGI R-L-F e rapresente un pas in plui sul troi de inovazion tecnologjiche inviât intai ultins agns. La Agenzie di fat e met za a disposizion une vore di imprescj digjitâi pe lenghe furlane: il SuperDizionari, la app GDBtf, il Coretôr ortografic e la Tastiere furlane. Dongje di chest, in colaborazion cun realtâts dal setôr tecnologjic e cun INSIEL, la ARLeF e je daûr a disvilupâ prodots digjitâi su la fonde de inteligence artificiâl, fra chescj un tradutôr automatic e i sistemis di sintesi e ricognossiment vocâl.

Udin, ai 10 di Març dal 2026

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<